

MI IN MIHING

Mihing ih cih in kizopna tawh anungta, (human being is a relational being), kizopna ii bulpi ahihi. Ih pumpi vante khempeuh in kizopna vive ahihi. Khut le khe tawh kizom, kampau mukpau tawh kizom, mit nangawn tawh akizom te ihihi. Tua ahih man in kizopna in mihing ih hih na ahihi (the essence of your being is the quality of your relationship). *Pasian in mihing te tawh hong kizop kik nadingin, a Tapa Mihing in hongpai sak in, tua a Tapa sungah eite khempeuh amah tawh hong kizoppih ahihi.* Tua kizopna thu, tawmkha ih lungngaih ciangin, anuai a kizopna pi nam nga i mu thei hi:

1. Innkuan kizopna (family relationships)
2. Mi tawh kizopna (social relationships)-nang le midang kizopna.
3. Kiimlehpam tawh kizopna –mihing te leh ngeina, pianzia, nuntak zia te; sung le pu, u le nau kizopna, na omna minamte ii ngeina, nangma ngeina cihte leh kipawl na tuamtuum te tawh kizopna., gentehna in, kum pi tawh kizopna, tungsiah tuamtuum tawh kizopna, tu hun khangno tawhkizopna, khanglui papi nupi te tawh kizopna, cih te:
4. Na te tawh kizopna vanzat tuamtuum ahi sum, um leh bel, muhtheih sukkhak theih nate,etc., (the material world) bangci zat, bangci kep, bangci zon, bangci nek, bangci dawn cih te:
5. Muh theih muh theihloh akipiangsak nakhem peuh tawh kizopna: huih le guah, khuahun, alum avot, tui khang, mimcim, guah zulo, khuazing khuavak cihte tawh kizopna (relationships with the natural world; the cosmos, the ecological system in which we people live).
6. Mihing leh Pasian kizopna (relationship with Spiritual Being: God).

Hi te ban ah, nisim naisim, leh ahun simin kizopna ihnei lai hi. Tua kizopna te in “Nang leh kei” lung sim pumpi kizopna te hi in, atunga kizopna te lungsimleh gamtatna tawh lahkhiat na zong ahi hi. Hih anuai a nihte om lo in, atung a te ah, kizop na hoih, a om nang haksa mahmah hi. Lamkhat pan genleng, hih anuai a kizopna te lo in, atung a kizopna guk te picing ngeilo, siangtho ngeilo, hoih ngeilo, etlawm ngeilo, khangto ngeilo, lawhcing ngeilo hi.

Tua kizopna nih te in:.

1. Pumpi khut le khe, mit le nak muk le kam, neihsa lamsa, sum le paai, silh le teen te tawh kizop na, (Physical relationships). Lamkhat panin, pumpi taksa ading akisam te ah kipanpih na tawh kizopna te ahihi.

2. Lungsim ngaihsut na tawh kizop na; thapiak na, thu hoih kivaikhak na, thuphakiapiak na, thu ki ngetsakna, kivei pihna, ki nuampih na, kidah pihna, vangkiapiak na, cih te khempeuh tawh kizopna (psychic relationship). Lamkhat in genleng, lungsim cidamsak thei, lungsim khangtosak thei kizopna te hi.

Hi cibanga kizop nate, hoihphatak leh siangtho tak a, ih nuntak pihna in, mihing manphatna leh, mihing thupi't na, ganhingte neihtheih loh ahi, mihing ih hihna ii vangliatna hong kilang sak hi. Tua ahih man, MI pan in MIHING taktak ih hih na ihlah khiat nading in Pasian in amah le ei, ei le ei, ei le nakhempeuh te Christu Jesu sungah hong kizoppihna, ngaihsun kawmkawm in, mihing i hihna pakbang tawisiam ni.